



Z elanom do noweho šulskeho lěta 2025/2026

Po lětnich prózdninach je zaso žiwjenje do Budyskeho internata začahnyło.

Lětsa mamy dvě holcy ze Slepoho, kotrež chodźitej do 10. lětnika. Nimo zdalenosće wot domizny a noweje rjadownje je serbsčina za njeju wosebite wužadnje. Kontakt k sobušulerjam a wobydlerjam internata je drje zwjetša němskorěčny. Prócujemy pak so jara, jeju pomału a jasnje serbsce narěčeć a jenož mało němsce wospjetować. Čim konsekwentnišo z nimaj serbujemy, čím wjetša je jeju šansa, so do řeče zanurić. Džakowano Radworskej staršiskej iniciatiwje mamy nalěpki ze serbskimi wobrotami, kotrež smy w jeju stwě, kuchni a klubowni nalěpili. Derje wšak by było, byštej-li so za čas jeju přebywanja w Budyšinje w serbsčinje wukmanić móhtoj.

Zeznawanski wječor bě dobra składnosć, kontakty mjez lětnikami rozšěrić. Nimo praženych kołbaskow a zucchinijow su hry k tomu přinošowali a mjezsobnu wćipnosć zbudźili. Z tójšto prašenjemi za bingo na cedli dachu so šulerki a šulerjo do rozmołwow. Při tym so wukopa, zo mamy tuchwilu jenož jednoho šulerja w internaće, kotryž chcył so z wučerjom stać. Člonow Smjerdžečanskeje rejowanskeje skupiny scyła žanych nimamy, za to čím wjace Wudworskich. Tež hudźbne nadarjenosće zwěsćichmy.



Wjeselimy so, je so lóšt na škotowanje znova zbudził. Tež joga zaso praktikujemy. Naši šulerjo hraja rady blidotenis, wolejbul a billard. Někotři chodža prawidłownje do płuwarnje, na kopańcu abo wolejbul. Dopomoc w matematice je jara prašana a derje wopytana. Nimale kóždy wječor zhromadža so někotři w internatnej sportowni, zo bychu swoje myški trenowali.

W septembru wobdžělachu so mnozy na probach za předstajenje pasionskeje hry w Chrósćicach.

Klubkino z Michaelu Hrjehorjowej wjedźemy dale. W septembrje běchmy na premjerje knihi “Animal farm abo hotowe swinstwo” w Smolerjec kniharni. Někotre dny pozdžišo čitaše Lubina Hajduk-Veljkovićowa ze swojeho přeložka “Krabat a čorný mišter” po Otfrieda Preußlerowym młodžinskim romanje pola nas w internaće.

Slowčina na zahrodže internata lětsa zaso derje njese. Dwójce smy sej slowkowy tykanc napjekli, kotryž bě tak stódný, zo bě wječor hižo zjědženy.

Što mamy do hód hišće planowane? Kulturny běrow Sakska z.t. chce ze zajimowanymi šulerjemi projekt na temu “Kajke je žiwjenje w Budyšinje za młodžinu” přewjesć. Kónc oktobra chcemy zhromadnje z přirodoškitnej staciju Njeswačidło džěłarničku wo prawym wobchadženju z wotpadkami zarjadować. A planujemy rejowanski wječor z folk-rejemi z Łužicy a cyłeho swěta.



W adwenće wabi naša hodowna paslenska stwa do džěła, runje tak kaž pječenje poprjančkow. Za adwentničku chcemy sej Měranu Cušcynu ze swojimi lóštnymi stawizničkami z knihi “Stop a stup” přeprosyc.

Monika Süßowa, kubłarka